

REGIONAL NEWS BULLETIN

HEADLINES (MORNING)

1. Mizoram Larsap thar tur General (Rtd) VK Singh chu vawiin chawhnu hian Mizoram a lo thleng ang.
2. Chief Minister Pu Lalduhoman State Bank of India Chief General Manager Pu Sahadevan Radhakrishnan kawmin Hand Holding Scheme kaltlanga thawhhona tur a sawipui.
3. Prime Minister Narendra Modia chuan nimin khan thiamna changkang hmanga sik leh sa dinhmun vilna Mission Mausam a hawng.
4. Nizan khan ni nga cham turin Singapore President Tharman Shanmugaratnam chuan India a lo thleng.

<><><>

NEWLY APPOINTED GOVERNOR TO ARRIVE

Mizoram Larsap thar tur General (Rtd) VK Singh chu vawiin chawhnu hian Mizoram a lo thleng dawn.

Larsap thar tur hi Chief Minister Pu Lalduhoma, Speaker Pu Lalbiakzama, Home Minister Pu K. Sapdanga bakah sorkar hotu dangten Lengpui airport-ah an lo dawngsawng dawn a. Mizoram Police in zahna chibai an lo buk dawn bawk a ni.

VC

Mizoram Larsap thar tur General VK Singh hi Indian Army Chief of Army Staff hlui niin he dinhmun hi kum 2010 atanga 2012 chung a chelh a, four star General niin Indian Army hotu hmingtha tak a ni a. A hna atanga a chawlh hnuin BJP Party a zawm a. Member of Parliament a ni tawh a. Ministry of Road Transport and Highways leh Ministry of Civil Aviation changtu Minister of State a lo ni tawh a. Hemi hma hian Minister of State for External Affairs, Minister of State (Independent Charge) for Development of the North-Eastern Region leh Minister of State for Statistics and Programme Implementation a ni tawh bawk a ni.

(Corr)

<><><>

CM

Chief Minister Pu Lalduhoma chuan nimin khan a office-ah State Bank of India Chief General Manager Pu Sahadevan Radhakrishnan a kawm a. Hand Holding Scheme kaltlanga thawhhona tur thil leh SBI kaltlanga hmalak theihna dangte a sawipui.

Chief Minister chuan, Mizo thalaite Banking sector lama an tlin tlem thin avanga bank-a thawktu indaih lohna te, loan lak dawna bank lamin income tax certificate an lo phut thin chu income tax pe ve lo state an nih avanga a kalphung tihdanglam tha a tih thu te, Aizawla private bank thenkhat CD ratio hniam lutuk chu veiawm a tih thu a hrihl a. SBI leh bank dangten an CSR tam zawk Mizoramah hmang se an duh thute leh bank nena thawkhova hand holding scheme kalpui tur chungchangah Hand Holding loan bik lo bawhzui nghal zeltu tur thawktu hran an credit processing centre-a dahsak turin a ngen a ni.

Chief General Manager hian, Hand Holding Scheme ruahmanna chu tha a tih thu leh, India ram hmun dangah pawh heng aia tha hi a awm bik chuang lo va a hriat thu Chief Minister hi a hrihl a. A hlawhtlin ngei theih nan SBI chuan a tulna apiangah sawrkar thawhpui dawn tih a sawi. Chief Minister hian Hand Holding bik loan lo umzuitu tur bik thawktu, an credit processing centre-a dah pawh an lo tum tur thu a sawi a ni.

Vawiin hian Chief Minister hovin State Level Banker Meeting neih a ni ang.

(DIPR)

<><><>

HOME MINISTER

Home Minister Pu K Sapdangan Mizoram chu ramchhunga boruak thianghlimna ber State ni tur a tan lak a pawimawh a ti.

Nimina Krismas leh kumthar vuakvet a halpuah leh halmawi khuahkhirhna kalpui dan thlirletna hunah he thu hi sawiin Pu Sapdanga chuan Mizoram boruak vawn thianghlim zel tumna avanga krismas leh kumthar vuakvet a halpuah leh halmawi khuahkhirhna kalpuina kawng a sawrkar, kohhran leh tlawmngai pawl thawhhona leh hmalakna fakawm a tih thu sawiin hmasawanna nasa tak hmuh tur a awm chu lawmawm a tih thu a sawi a. Thlirletna hun pawimawh tak kaltlang hian hmalak chhunzawm dan tur ruahmanna tha tak duan chhuah ngei a beisei thu a sawi.

He huna tarlan anih danin Mizoram pum a halpuaah leh halmawi kaihnhawih tupek bawhchhiatna avanga case ziah luh 55 zing a 48 chu Aizawl district huam chung ami a ni a. Lungleiah case 1, Champhaiah 5, Serchhipah 1 a awm a. Heng thubuai kaihnhawih a bungrua man khawm hlutna hi Cheng nuai 24 a chuang a ni. Pollution Control Board atanga tarlan danin Aizawl khawpui a Kum 2023 Dec ni 31 zan a boruak thianglim lam tehna, Air Quality Index (AQI) chu 597 a nih lain kum 2024 Dec ni 31 zan ah erawh 115 a ni a, Mizoram district hrang hranga AQI Manual Station atanga a lan danin district dangte pawh AQI 50 hnuai lam ah a awm deuh vek thu tarlan a ni a, Health & Family Welfare Department tarlan danin kumhluh thlah zan khan, Aizawl Civil Hospital-ah halpuaah leh halmawi avanga inhliam leh harsatna tawk, Damdawi in a inentir an awm lo a ni.

Thutkhawmnaah hian Home Department, Aizawl DC Office, YMA leh kohhran kaltlang a hmalakna kalpui dan te ngaihthlak a ni a. Media leh Social media tangkai tak a hman a nih thu te tarlan a ni. Hei bakah hian Halpuaah leh halmawi khuahkhirhna kalpui zel dan tur ruahmanna siam turin 'Working Committee' din ni se tih rel a ni bawk.

(DIPR)

<><><>

CM

Nimin khan Chief Minister Pu Lalduhoma chuan a office ahWorld Bank Water Resource Specialist Dr. Anju Gaur a kawm a. National Hydrology Project, Irrigation and Water Resources Department ten an kalpui mek chungchang leh World Bank kaltlanga hmalak theih chite a sawipui.

Ram pumpui water resource data neih tumin sawrkar laipui chuan Ministry of Jal Shakti kaltlangin World Bank nena tang dunin National Hydrology Project a kalpui mek a. Mizorama he hmalakna enpui turin Dr. Anju Gaur hi a rawn zin mek a ni. Dr. Anju Gaur hian Mizoram sawrkar hmalakna chu lungawithlak a tih thu Chief Minister hi a hrilh.

Chief Minister hian, ruahtui khawkhawm theihna lian tham tak kalpuina tur Mizorama a awm thu a lo hrilh a. National Hydrology Project an kalpui mekah duhsakna hlanin tuihna humhalh leh tui lam kaihnhawih hmalakna, World Bank hnuai kalpui theih tur chi te a sawipui bawk.

(DIPR)

<><><>

HAULAWNG

Lunglei District Deputy Commissioner Office hma laknain District mipuite'n chiang zawka sawrkar hma lakna an hriat a, an chhawr tangkai theih nana an kawtkaia kal chilhna hun "Prashasan Gaon Ki Ore" (I Kawtkaiah Sawrkar) campaign chu a tum khat nan Haulawngah nimin khan buatsaih a ni.

Lunglei District Bawrsap Pi Navneet Mann chuan Prashasan Gaon Ki Ore hnuai Lunglei District- a sawrkar hma lakna hrang hrang inhrilhfiyah nan leh awlsam zawka mipuiin sawrkar office an dawr theih nana department inehhawp chhuakte chu chhawr tangkai tum theuh turin Haulawng mipuite chu chahin, "I Kawtkaiah Sawrkar" campaign kalpui tur chu a hawng nghal a ni.

He hun hi Lunglei District Additional Deputy Commissioner Pi Rochuangkimi Khenglawt chuan kaihruaiin, "I Kawtkaiah Sawrkar" tih hma lakna chu mipuiin khawpui pan kher ngai lova awlsam zawka sawrkar office hrang hrang an dawr theih nana ruahman a nih thu a sawi.

Haulawnga Prashasan Gaon Ki Ore hun buatsaihah hian office hrang hrang - DC, Agriculture, Horticulture, Irrigation, BDO, AH & Vety, Social Welfare, DCSO, DEO, Industries leh Medical lam te'n stall hawngin, awlsam zawka mipuite dawr theih turin an inpho chhuak a. Electoral roll enfiah/inziah luh, Aadhaar siam that/siam thar, member belh/paih & ration card leh Aadhar link, bank account hawn thar leh sawrkar scheme hrang hranga inziah luh leh mipuiin harsatna an thlenna hun te buatsaih a ni.

I Kawtkaiah Sawrkar programme hi kalpui chhuzawm zel tur niin, a thawh khatna January thla chungga kalpui turah khaw pali thlan a ni a. Ralvawng, Bualte leh Bunglemunah te buatsaih leh a ni ang.

(DIPR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Wawiin chawhnu dar 2 leh a chanve-ah Chanchinthar hi puan leh a ni ang.

<><><>

MUSEUM

Mizoram State Museum chu nikum 2024 chhung khan mi 9,749 in an tlawh.

Mizoram State Museum enkawltu ten Akhasvani an hrilh danin Mizoram State Museum tlawh tu zingah hian puitling 3893 awm in ,naupang 2806 an awm a, ramdang mi 33 an awm bawk a ni.

Museum thawktute chuan Museum chu ram rohlu dah khawmna a nih angin mipui te a tam thei ang a tlawh turin an sawm a. Mifing leh mi changkang apiangin an hnam dan, nungphung leh rohlu an hlut thiam angin Zofa te pawhin hnam rohlu hlutna chhawm nun zel nan Museum tlawh thin a pawimawh tih an sawi a ni.

<><><>

PM

Prime Minister Narendra Modia chuan nimin khan thiamna changkang hmanga sik leh sa dinhmun vilna Mission Mausam a hawng. India Meteorological Department, IMD dincham wawi 150-na lawmna Bharat Mandapam New Delhi-ah Mission mausam hi hawn a ni a. Thusawiin PM Modia chuan Mission

Mausam chu ramin hmabak thuantling a neih theihna tur a ni a ti a. IMD in kum 150 chhunga zinkawng ropui tak an zawh chu tunlai science and technology khawvelah bungthar an kaina anih thu a sawi a. India mipuite tan rawng an bawl mai niloin science lama hmasawna entirtu an ni a ti bawk.

(Newsonair)

<><><>

SINGAPORE

Nizan khan ni nga cham turin Singapore President Tharman Shanmugaratnam chuan India a lo thleng a. Nizan khan Union Minister of State for Commerce and Industry, Jitin Prasada chuan alo dawngsawng a ni. President Shanmugaratnam hi Minister, MP leh mi pawimawh tak takten an rawn tawiawm a. Tun tum Singapore President a rawn zin hmasak ber a ni a. A cham chhung hian President Draupadi Murmu nen an inkawm ang a. Prime Minsiter Narendra Modia nen an inkawmna hun an hman dawn bawk a ni.

(Newsonair)

<><><>

TURMERIC BOARD

Prime Minister Narendra Modia chuan National Turmeric Board din a ni chu lawmawm a tih t hu a sawi. Social Media-a a thu dahah Pu Modia chuan abik takin ramchhunga aieng chingtute tan thu lawmawm tak a ni a ti a. He board kaltlang hian ngaihtuahna thar hman kawngahte, khawvel huapa tihlarna leh aieng hlutna tihpun kawngah hmasawna a awm ngei ang a ti a. Aieng hralhchhuahna a ti changtlung ang a, loneitute leh a leitute tan hlawkna a thlen dawn a ni a ti bawk.

(Newsonair)

<><><>